



TEKS UCAPAN

YB TUAN LOKE SIEW FOOK
MENTERI PENGANGKUTAN MALAYSIA

PROGRAM PEMBAHARUAN TEKSI MADANI NASIONAL
BERSAMA YB MENTERI PENGANGKUTAN

16 JULAI 2026 | KHAMIS
KING HALL, WISMA CITY KINGDOM, SEREMBAN,
NEGERI SEMBILAN

SALUTASI

- (1) Yang Berbahagia Dato' Seri Jana Santhiran Muniayan,
Ketua Setiausaha, Kementerian Pengangkutan
Malaysia;**
- (2) Yang Berbahagia Dato' Ir. Abdul Rashid bin Musa,
Timbalan Ketua Pegawai Eksekutif, PROTON Holdings
Berhad;**
- (3) Ketua-ketua Jabatan dan Agensi Kerajaan;**
- (4) Wakil-wakil persatuan, pengusaha dan pemandu teksi
dan e-hailing;**
- (5) Rakan-rakan media serta tuan puan yang saya hormati
sekalian.**

Salam Sejahtera dan Salam Malaysia MADANI.

1. Sebagaimana hadirin sedia maklum, Yang Amat Berhormat Perdana Menteri telah merasmikan Program Pembaharuan Teksi MADANI Nasional dua minggu lalu di Kuala Lumpur. Program ini mencerminkan keprihatinan, iltizam dan komitmen Perdana Menteri Dato Seri Anwar Ibrahim untuk terus memperbaharui industri teksi negara supaya pemandu memperoleh peluang yang lebih baik, manakala rakyat menikmati perkhidmatan yang lebih selamat, selesa dan berkualiti.

2. Sebagai kesinambungan terhadap kejayaan peluncuran program tersebut, maka sukacitanya saya ingin umumkan bahawa Perdana Menteri Dato Seri Anwar Ibrahim, merangkap Menteri Kewangan, telah setuju kepada peruntukan tambahan sebanyak RM10 juta kepada Program Pembaharuan Teksi MADANI Nasional.

3. Penambahan peruntukan kepada Program Pembaharuan Teksi MADANI Nasional penting dalam usaha Kerajaan meningkatkan kesedaran dan penyertaan pengusaha serta pemandu teksi dan kereta sewa, terhadap pelbagai inisiatif yang diperkenalkan setakat ini.

4. Oleh itu pada petang ini, saya ingin merakamkan penghargaan dan ucapan terima kasih kepada wakil-wakil

persatuan teksi yang telah menyuarakan pandangan dan cadangan yang bernas, termasuk juga rintihan dan cabaran yang dihadapi oleh para pemandu teksi. Industri teksi telah sekian lama menjadi sebahagian daripada sistem pengangkutan awam negara serta memainkan peranan penting bagi memudahkan perjalanan harian rakyat.

5. Selaras dengan aspirasi Perdana Menteri Dato Seri Anwar Ibrahim, Program Pembaharuan Teksi MADANI Nasional bukan sekadar menawarkan peluang pembiayaan bagi menggantikan kenderaan lama, malah menjadi satu inisiatif menyeluruh yang memberikan tumpuan kepada peningkatan kesejahteraan pemandu, keselamatan pengguna jalan raya dan kelestarian industri pengangkutan awam negara.

6. Menerusi program ini, pemandu teksi dan kereta sewa diberikan penerangan secara langsung mengenai pelbagai manfaat yang disediakan termasuk skim pembiayaan yang lebih mesra pemandu, peluang meningkatkan pendapatan, perlindungan keselamatan sosial, proses permohonan permit dan pelbagai insentif yang menyokong usaha pemodenan industri.

7. Pemilihan Proton S70 sebagai model teksi di bawah program ini dibuat berdasarkan kesesuaiannya untuk operasi teksi, termasuk dari aspek keselamatan, keselesaan dan

kecekapan penggunaan bahan api. Pendekatan ini selaras dengan usaha Kementerian Pengangkutan dalam menggalakkan penggunaan kenderaan teksi yang lebih moden dan berkualiti bagi meningkatkan keyakinan rakyat terhadap perkhidmatan teksi.

8. Bagi menyokong pelaksanaan program ini, PROTON melalui EON bersama institusi kewangan turut menyediakan pilihan kaedah pembiayaan bagi memudahkan pemandu teksi beralih kepada kenderaan baharu mengikut keperluan dan kemampuan masing-masing.

9. Transformasi industri teksi bukan sekadar menggantikan teksi lama dengan teksi baharu tetapi juga memastikan pemandu teksi mendapat lebih banyak peluang menerima tempahan melalui platform *e-hailing*.

10. Kerajaan sentiasa memupuk kerjasama yang lebih erat antara industri teksi dengan platform *e-hailing*. Kita tidak melihat kedua-duanya sebagai pesaing, malahan sebagai rakan strategik yang saling melengkapi bagi menyediakan perkhidmatan yang lebih baik kepada rakyat, di samping membantu meningkatkan pendapatan pemandu teksi.

11. Inilah matlamat utama Kerajaan, iaitu membantu pemandu meningkatkan pendapatan, mengurangkan kos operasi dan memberikan perkhidmatan yang lebih berkualiti kepada rakyat.

12. Antara manfaat utama Program Pembaharuan Teksi MADANI Nasional ini ialah:

- (i) **Pertama**, pemandu teksi akan menggunakan Proton S70, sebuah kenderaan baharu yang moden, selamat dan selesa. Kenderaan yang lebih cekap ini bukan sahaja memberikan pengalaman memandu yang lebih baik malah membantu menjimatkan penggunaan bahan api dan kos penyelenggaraan. Ini memberi ruang kepada pemandu menikmati pendapatan bersih yang lebih baik.
- (ii) **Kedua**, Kerajaan akan menambah baik proses pemeriksaan berkala di PUSPAKOM atau mana-mana Pusat Pemeriksaan Kenderaan Motor (PPKM) berlesen dengan memberi keutamaan kepada teksi semasa pemeriksaan. Langkah ini akan memudahkan urusan pemandu, mempercepatkan proses pemeriksaan dan pada masa yang sama memastikan standard keselamatan kenderaan terus dipatuhi.

- (iii) **Ketiga**, pemandu teksi boleh memilih pakej pembiayaan yang paling sesuai dengan kemampuan masing-masing, sama ada melalui sewa beli dengan ansuran harian yang lebih rendah atau pakej pajakan yang turut merangkumi kos penyelenggaraan kenderaan.
- (iv) **Keempat**, Kerajaan turut memperkenalkan identiti baharu untuk teksi di Malaysia. Dengan reka bentuk yang lebih moden tanpa *taxi topper*, penggunaan nombor pendaftaran khas "GET" serta meter teksi digital, imej teksi akan menjadi lebih moden, lebih mudah dikenali dan meningkatkan keyakinan rakyat terhadap perkhidmatan teksi.

13. Program pada hari ini adalah untuk memberikan maklumat yang lebih terperinci berhubung manfaat dan proses permohonan Teksi MADANI Nasional serta mengambil kesempatan ini untuk memberikan peluang kepada pemandu teksi di luar lembah Klang untuk melihat dengan lebih dekat Proton S70 yang dipilih sebagai model teksi di bawah inisiatif ini. Dengan kenderaan yang lebih moden, pilihan pembiayaan yang lebih sesuai serta sokongan dasar Kerajaan, kita mahu industri teksi terus berkembang dan memberikan perkhidmatan yang terbaik kepada rakyat.

14. MOT, APAD dan agensi kerajaan yang lain akan terus bekerjasama rapat dengan semua pihak berkepentingan bagi memastikan pelaksanaan program ini berjalan lancar dan mencapai objektif yang telah ditetapkan.

15. Pada masa yang sama, saya juga amat mengalu-alukan kerjasama strategik yang melibatkan pelbagai pihak termasuk agensi kerajaan, persatuan teksi, institusi kewangan, pengeluar automotif dan pengendali platform *e-hailing*. Kerjasama ini amat penting bagi memastikan manfaat program dapat dinikmati secara menyeluruh oleh komuniti teksi.

16. Sebelum mengakhiri ucapan, saya sekali lagi mengucapkan terima kasih kepada JPJ, APAD, PROTON, PERKESO, Persatuan Gabungan Teksi Malaysia (GTSM), AirAsia Ride dan semua platform *e-hailing* atas kerjasama secara langsung dan tidak langsung terhadap program ini serta kepada semua pihak yang hadir pada hari ini.

17. Tidak lupa juga ucapan terima kasih dan sekalung penghargaan ingin saya sampaikan kepada Kementerian Kesihatan Malaysia (KKM) dan Kementerian Perdagangan Dalam Negeri dan Kos Sara Hidup (KPDN) yang turut sama memeriahkan lagi program pada kali ini.

18. Semoga usaha yang dilaksanakan ini menjadi pemangkin kepada transformasi industri teksi negara supaya lebih moden, lebih berdaya saing dan mampu memberikan perkhidmatan yang terbaik kepada rakyat.

Sekian, terima kasih.

[TAMAT]